

आकाशवाणी

खास-खास खबरां:-

प्रधानमंत्री नरेन्द्र मोदी होरें आखेआ ऐ जे भारत च कथावाचन दी बड़ी समृद्ध परम्परा रेही ऐ ते देसैं च ऐसी कैई रचनात्मक प्रतिभा हैं जेहड़ियां भारत गी रचनात्मक सामग्री पैदा करने दा इक वैश्विक केन्द्र बनाने च मददगार होई सकदियां न।

सरकार नै मंत्रिमंडल सचिव डाक्टर टी.वी सोमनाथन ते गृह सचिव गोविंद मोहन हुंदा कार्यकाल इक बरे लेई बधाने दा ऐलान कीता ऐ।

झारखंड च भर्त्थी मतेयानें च कथित बेजाब्लिएं दे विरोध च विद्यार्थियां दा प्रदर्शन तेज होई गेदा ऐ। राज्य च विधानसभा दा बरसांती आहला इजलास बी अज्ज शुरु होआ रदा ऐ।

उत्तराखंड दे मुखमंत्री पुष्कर सिंह धामी होरें राज्य दे किश हिस्से च लगातार बरखा दी चेतावनी गी दिक्खदे होई सारे सरबन्धित विभागें गी हाई अलर्ट पर रौहने दा निर्देश दिता ऐ।

भारत ने श्रीलंका गी अपने गिरफ्तार कीते गेदे मछेरें गी तौले रिहा करने लेई आखेआ ऐ, जेहड़े मच्छियां फड़दे-फड़दे भलेखे च श्रीलंका दे इलाके च बड़ी जंदे न।

सरकारें आखेआ ऐ कि पच्छिम एशिया च गंभीर सुरक्षा स्थिति दे बावजूद बी 60 भारतीय कारोबारी जहाज सुरक्षित ढंगें नै होर्मज जल डमरु पार करियै निकली आए न।

<><><><><><>

PM –Ind. Storytelling

प्रधानमंत्री नरेन्द्र मोदी होरें आखेआ ऐ जे भारत च कथावाचन दी बड़ी समृद्ध परम्परा रेही ऐ ते देसैं च ऐसी कैई रचनात्मक प्रतिभा हैं जेहड़ियां भारत गी रचनात्मक सामग्री पैदा करने दा इक वैश्विक केन्द्र बनाने च मददगार होई सकदियां न। मोदी होरें एह गल्ल कल नेटफ्लिक्स दे उपमुख्य कार्यकारी अधिकारी टेड सेरेन्डोस हुंदे कन्नै नमीं दिल्ली च मलाटी करने दे बाद इक सोशल मीडिया पोस्ट च आक्खी।

मोदी होरें दस्सेआ जे मलाटी दौरान टेड हुंदे कन्नै मीडिया ते मनोरंजन केन्द्र दे बारे च चर्चा होई। नेटफ्लिक्स मुजब दौने धड़े बश्कार भारत दे मीडिया ते मनोरंजन उद्योग गी अंतराष्ट्री स्तर पर लेई जाने बारे चर्चा होई। नेटफ्लिक्स ने नेटफ्लिक्स इंडिया स्टोरी टेलिंग आहली इक पैहल शुरु करने दी घोषणा कीती ऐ।

<><><><><><>

Cabinet Secretary Tenure

सरकार नै मंत्रिमंडल सचिव डाक्टर टी.वी सोमनाथ हुंदा कार्जकाल इक बरे लेई बदाई दिता ऐ। नियक्तिएं सरबंधि मंत्रीमंडल समीति नै कल एहदी मंजूरी दिती। डाक्टर सोमनाथ हुंदा कार्जकाल इस महीने दी 30 तरीक गी मुक्का रदा हा। समीति नै उन्दे इलावा गृह सचिव गोविंद मोहन हुंदा कार्जकाल बी इक बरे लेई बधाने दा ऐलान कीता ऐ।

<><><><><><>

Jharkhand Student Protest

झारखंड च भर्थी मतेयानें च कथित बेजाब्तिएं दे विरोध च विद्यार्थियां दा प्रदर्शन तेज होई गेदा ऐ। राज्य च विधानसभा दा बरसांती आहला इजलास बी अज्ज शुरु होआ रदा ऐ। पिच्छले 4 दिनें थमां भुक्ख हड़ताल करा करदे झारखंड लोकतांत्रिक क्रांतिकारी मोर्चा दे नेता देवेन्द्र नाथ माहतो हुंदे कन्नै 4 होर प्रदर्शनकारी बी शामिल होई गेन। इंदे च दंऊ महिलां बी शामिल न। ब्लड शूगर ते ब्लड प्रेशर घट्ट होई जाने कारण माहतो हुंदी सेहत गी लेइयै चिंता पैदा होई गेदी ऐ। इससै दौरान मुखमंत्री हेमंत सोरेन होरें कल आखेआ ऐ जे उन्दी सरकार विद्यार्थियें दिएं समस्याएं दे हल्ल गितै पूरी चाल्ली बचने बज्झी दी ते दृढ़ संकल्प ऐ। उ'नें आखेआ जे जांच एजेंसियां अपना कम्म करा करदियां न ते दोषिएं गी कन्नो-कन्नी जेल भेजया जा'रदा ऐ। झारखंड च भर्थी मतेयानें च सुधार आहन्ने दी मंग गी लेइयै राजधानी रांची च 25 जुलाई थमां विरोध प्रदर्शन शुरु होए देन। प्रदर्शनकारी -विद्यार्थी 14में झारखंड लोकसेवा आयोग सिविल मतेयान रद्द करने दी मंग करा करदे न।

<><><><><><>

Uttrakhand Rain

उत्तराखंड दे मुख्यमंत्री पुष्कर सिंह धामी होरें राज्य दे किश हिस्सें च लगातार बरखा दी चेतावनी गी दिक्खदे होई सारे सरबंधित विभागें गी हाई अलर्ट पर रौहने दा निर्देश दिता ऐ। उ'नें SDRF, NDRF, जिला प्रशासन ते होरनें एजेंसिएं गी नेड़मा तालमेल बनाई रखने ते कुसै बी आपात स्थिति च राहत ते बचाव अभियान यकीनी करने लेई आखेआ। मौसम विभाग नै देहरादून, चमोली ते बागेश्वर जिले च तेज बरखा आस्तै ऑरेंज अलर्ट ते राज्य दे बाकी हिस्सें आस्तै येलो अलर्ट जारी कीता ऐ। बरखा करी चमोली ते बागेश्वर जिले च अज्ज 12 जमात तगर स्कूल बंद रौहडन।

<><><><><><>

India-Srilanka Cooperate

भारत ने श्रीलंका गी अपने गिरफ्तार कीते गेदे मछेरें गी तौले रिहा करने लेई आखेआ ऐ, जेहड़े मच्छियां फड़दे-फड़दे भलेखे च श्रीलंका दे इलाके च बड़ी जंदे न। एह मुद्दा हाल च गै दौनें मुख्य बशकार होई दी उच्ची स्तर दिएं बैठके दौरान पुट्टेआ गेआ ऐ। भारत अपनी “गोआंड सब्भने शा पैहले” आहली नीति तैहत श्रीलंका कन्नै अपने सरबंधें गी मजबूत करा करदा ऐ। ध्यानजोग ऐ कि Palk जल डमरु मध्य दी समुन्द्री सीमा पार करने दे आरोप च श्रीलंकाई नोसेना आसेआ भारतीय मछेरें दी गिरफ्तारी ते उन्दियें किशितियें गी जब्त करने दियां घटना अक्सर दौनें मुख्य बशकार चर्चा दा विशे रौहंदियां न।

<><><><><><>

India –Ships

सरकारै आखेआ ऐ कि पच्छिम एशिया च गंभीर सुरक्षा स्थिति दे बावजूद बी 60 भारतीय कारोबारी जहाज सुरक्षित ढंगै नै होर्मज जल डमरु पार करियै निकली आए न। संसद च इक सोआले दे परते च सरकार नै जानकारी दिती जे खाड़ी क्षेत्र थमां 3 जहार 972 भारतीयें गी मुख्य वापस भेजेआ गेआ ऐ ते 24 घंटे कम्म करा'रदी आपदा प्रबंधन सुविधा कश जहारा फोन ते ई-मेल हासल होआ करदे न।

होर्मुज जल डमरु मध्य फारस दी खाड़ी गी ओमान दी ते अरब सागर कन्नै जोड़दा ऐ। उर्जा ते ईंधन सप्लाई लेई एह दुनिया दा इक प्रमुख समुन्द्री रस्ता ऐ।

<><><><><><>

Iran –US Agreement

ईरान नै आखेआ ऐ जे ओह होर्मुज जल डमरु मध्य गी लेइए ओमान कन्नै समझौते दा मसोदा तयार करने दे खीरी गेड़ च ऐ ते अमरीकी राष्ट्रपति डोनाल्ड ट्रम्प होंरें आखेआ जे इस हफ्ते समझौते दी घोषणा कीती जाई सकदी ऐ। इस महत्वपूर्ण समुन्द्री रस्ते दे परतिए खुल्लने कन्ने विश्व अर्थ-बवस्था पर दबाव घट्ट होने ते युद्ध गी खत्म करने च मदद थोई सकदी ऐ, पर एह समझौता खुशबा ईरान दे बंदरगाहें पर अमरीका आसेआ लाए गेदे प्रतिबंध गी हटाने पर निर्भर होग। ईरान ने जल डमरु मध्य पर किश हद तगर काबू रखने पर ज़ोर दिता ऐ ते आखेआ ऐ जे एह युद्ध थमां पैहले आहला लेखा इक खुल्ला अंतराष्ट्रीय समुन्द्री रस्ता नैई बनोग।

<><><><><><>

Hiroshima Atomic Ann

अज्ज जापान दे हिरोशिमा च परमाणु बम्ब सुट्टे जाने दी बरसी ऐ। सन 1945 च होई दी इस घटना च इक लक्ख 40 जहार लोक मारे गे हे। अज्ज बड़लै घटना आहली थाहर पर पीस मैमोरियल पार्क च मौन रखेआ गेआ। इस मौके पर आयोजित कार्यक्रम च नेताएं परमाणु हथियारें गी खत्म कीते जाने दी अपील कीती। जापान दे हिरोशिमा ते नागासाकी शैहरे पर परमाणु बम्ब सुट्टे जाने कन्नै गै दुआ विश्व युद्ध समाप्त होई गेआ हा।

<><><><><><>

Police Reward -Terrorist

जम्मू-कश्मीर पुलसै जंदे महीने अनंतनाग जिले च इक पुलसकर्मी दी हतेआ च शामिल लश्करे-तैयबा दे आतंकवादी मोहम्मद लतीफ भट्ट दे बारे च कोई पुख्ता सूचना देने ते उसी गिरफ्तार करोआने आले गी 15 लख रुपें दा ईनाम देने दी घोशणा कीती ऐ। पुलसै, घाटी दिएं मुख्क थाहरें पर पोस्टर लाइयें आम लोकें कोला आतंकवादी मोहम्मद लतीफ भट्ट दे बारे च पक्की जानकारी मंगी ऐ। ध्यानजोग ऐ जे एह आतंकवादी कुलगाम दा बसनीक ऐ ते इन्नै'गै जंदी 22 जुलाई गी अनंतनाग दे लाल चौक च हैड कांस्टेबल आशिक हुसैन हुंदी कथित तौर पर हतेआ कीती ही। कनून नाफिस करने आली एजेंसियें हमले गी अंजाम देने दे बाद CCTV कैमरे च कैद होई दी भट्ट दिआं तस्वीरां बी सार्वजनिक कीतियां न।

<><><><><><>